

# 栗谷先生全書外編

## 醇言

### 1. 道生一 一生二 二生三 三生萬物

朱子曰 道即易之太極 一乃陽之奇 二乃陰之耦 三乃奇耦之積 其曰 二生三 猶所謂二與一爲三也 其曰 三生萬物即 奇耦合而萬物生也

天地之間 其猶橐籥乎

董氏曰 橐籥也 籥管也 能受氣鼓風之物 天地之間 二氣往來屈伸 猶此物之無心 虛而能受 應而不藏也

虛而不屈 動而愈出

古本皆釋屈作竭 無形可見 而無一物不受形焉 動而生生 愈出而愈無窮焉 朱子曰 有一物之不受則虛而屈矣 有一物之不應 是動而不能出矣

萬物負陰而抱陽 冲氣以爲和

董氏曰 凡動物之類 則背止於後 陰靜之屬也 口鼻耳目居前 陽動之屬也 植物則背寒向煖 故曰負陰而抱陽 而冲氣則運乎其間也 溫公曰 萬物莫不以陰陽爲體 以冲和爲用

○右第一章 言天道造化 發生人物之矣

### 2. 道生之 德畜之 物形之 勢成之 是以萬物莫不尊道而貴德 道之尊 德之貴 夫莫之爵而常自然

道即天道 所以生物者也 德則道之形體 乃所謂性也 人物非道 則無以資生 非德 則無以純理而自養 故曰道生德畜也 物之成形 勢之相因 皆本於道德 故道德最爲尊貴也

○右第二章 承上章 言道德有無對之尊也

### 3. 道常無 爲而無不爲

上天之載無聲無臭 而萬物之生實 本於斯 在人則無思無爲 寂然不動 感而遂通 天下之故也

○右第三章 亦承上章而言道之本體無爲 而妙用無不爲 是一篇之大旨也

#### 4. 三十輻共一轂 當其無 有車之用

朱子曰 無 是轂中空處 惟其空中故 能受軸而運轉不窮 董氏曰 謂輻轂相湊以爲車 即其中之虛 有車之用

挺埴以爲器 當其無 有器之用

董氏曰 挺 和土也 埴 粘土也 皆陶者之事 此亦器中空無然後 可以容物爲有用之器 下意同

鑿戶牖 以爲室 當其無 有室之用 故有之以爲利 無之以爲用

外有而成形 中無而受物外有譬則身也 中無譬則心也 利者順適之意 利爲用之器 用爲利之機也 非身則心無所寓而心不虛則理無所容 君子之心 必虛明無物然後 可以應物 如轂中不虛 則爲不運之車 器中不虛 則爲無用之器 室中不虛 則爲不居之室矣

○右第四章 三章以上 言道體 此章以後 始言行道之功 而以虛心爲先務 蓋必虛心然後 可以捨己之私 受人之善 而學進行成矣

#### 5. 五色令人自盲 五音令人耳聾 五味令人口爽

爽 失也 五色五音五味 本以養人 非所以害人而多循欲而不知節 故悅色者 失其正見 悅音者失真正聽 悅味者失其正味也

馳騁田獵 令人心發狂

董氏曰 是氣也 而反動其心 愚按好獵者 本是志也而及乎馳騁發狂則反使氣動心

難得之貨 令人行妨

董氏曰 妨謂傷害也 於善行有所妨也

是以聖人 爲腹不爲目故去彼取此

董氏曰 去 除去也 腹者 有容於內而無欲 目者逐見於外而誘內 蓋前章言虛中之妙用 故此則戒其不可爲外邪所實也

據除玄覽 能無疵乎？

滌除者 淨洗物欲也 玄覽者 照察妙理也 蓋既去聲色臭味之欲 則心虛境清 而學識益進 至於知行並至 則無一點之疵矣

愛國治民 能無爲乎？

修己既至 則推以治人而無爲而化矣

天門開闔 能爲雌乎？

開闔是動靜之意 雌是陰靜之意 此所謂定之以中正仁義而主靜也

明白四達 能無知乎？

董氏曰 此寂感無邊方也 愚按此言於天下之事 無所不知 無所不能 而未嘗有能知之心 詩所謂不識不知 順帝之則者也 夫如是則上下與天地同流 參贊化育而不自居也 下文乃申言之

生之畜之 生而不有 爲而不恃 長而不宰 是謂玄德

天地生物而不有其功 運用造化而不恃其力 長畜群生而無有主宰之心 聖人之玄德亦同於天地而已 玄德至誠 淵微之德也

○右五章 此承上車而始之以初學遏人欲之功 終之以參贊天地之盛 自此以後諸章所論 皆不出此章之義

## 6. 爲學日益 爲道日損 損之又損之 以至於無爲

學以知言道以行言 知是博之以文 故欲其日益 行是約之以禮 故欲其日損 蓋人性之中 萬善自足 善無加益之理 只當損去其氣稟物欲之累耳 損之又損之 以至於無可損 則復其本然之性矣

○右第六章 承上章以起下章之義

## 7. 治人事天 莫若嗇

董氏曰 嗇乃嗇省精神 而有斂藏貞固之意 學者久於其道則心廣氣充 而有以達乎天德之全矣 愚按事天是自治也 孟子曰 存其心養其性 所以事天也 言自治治人皆當以嗇爲道 嗇是愛惜收斂之意 以自治言則 防嗜慾養精神 慎言語節飲食 居敬行簡之類是嗇也 以治人言則 謹法度簡號令 省繁科去浮費敬事愛人之類是嗇也

夫惟齋 是謂早復 早復謂之重積德

董氏曰 重再也 朱子曰 早復者 言能齋則不遠而復 重積德者 言先已有所積復養以齋 是又加積之也 愚按人性本善 是先已有所積也

重積德則無不克 無不克則莫知其極 莫知其極 可以長久

不遠而復則己私無不克矣 克己復禮則天下歸仁 其德豈有限量哉 德無限量至於博厚高明 則是悠久無疆之道也

○右第七章 言入道成德以齋爲功 是損之之謂也 此下五章 皆申言此章之義

## 8. 少則得 多則惑

董氏曰 道一 而已得一則無不得矣 凡事多端則惑

跂者不立 跨者不行

跂則不能立 跨則不能行 疑惑於兩端 而不能主一者也

是以聖人抱一 爲天下式

董氏曰 隨時趨變以道而在乎 以謙約爲主 抱一則全體 是道也

不自見 故明 不自是 故彰 不自伐 故有功 不自矜 故長 夫唯不爭 故天下莫能與之爭

董氏曰 見顯也 此養德之方也 蓋抱一則無我 若更炙見自是 自伐自矜 則是我見未忘 烏可以言一哉 惟無我則光明盛大 愈久愈新 何爭之有 愚按書曰 汝惟不矜 天下莫與汝爭能 汝惟不伐 天下莫與汝爭功 卽此意也

自見者不明 自是者不彰 自伐者無功 自矜者不長 其於道也 曰餘食贅行 物或惡之 故有道者不處

溫公曰 是皆外競而內亾者也 如棄餘之食 附餘之形 適使人惡 董氏曰 有道者足於內而不矜於外也

○右第八章

## 9. 知人者智 自知者明

知人之善惡 固智矣 自知之知爲尤明明者智之實也

**知勝人者有力 自勝者強**

勝人者血氣之力也 自勝者義理之勇也 克己復禮則不屈於人欲而強莫加焉

**知足者富**

自知既明 無求於外而常足則富莫加焉 顏淵簞瓢陋巷孔子曲肱飲水 而其樂自如 舉天下之物 無以易其所樂 則豈非至富乎 彼牽於物欲而有求於外者 則心常不足 雖富有天下 猶非富也

**強行者有志**

董氏曰 惟自勝故志於道而自強不息 則物莫奪其志而與天同健矣

**不失其所者久**

董氏曰 知道而能行則 自得其所而居安矣 愚按知之明而守之固 則索位而行無願乎外 無入而不自得焉 此乃不失其所也 是悠久之道也

**死而不亡者壽**

孔顏既歿數千載而耿光如日月 豈非壽乎

○右第九章

## 10. 名與身孰親？身與貨孰多？

名者實之賓 於身為外物也 身一而已 貨財則衆多 若棄身而循名與物 則捨親而從賓 役一而求多 惑莫甚焉

**得與亡孰病？**

得名與貨則身必亡 是乃亡也 得身則雖亡名與貨 而不害乎為得也 然則得身與亡身 孰為病乎

**是故甚愛必大費 多藏必厚亡**

愛名者必損實 是大費也 藏財者 必失身 是厚亡也

**知足不辱 知止不殆 可以長久**

董氏曰 惟審於內外之分 則知止知足而無得失之患 故能安於性命之常 亦何殆辱之有 所以可長久也

○右第十章

### 11. 不出戶知天下 不窺牖見天道

萬物皆備於我 豈待他求哉 求其放心則可以見道矣 程子所謂自能尋向上去下學而上達者是也

其出彌遠 其知彌少

溫公曰 迷本逐末也 愚按心放而愈遠 則知道愈難矣

是以聖人不行而知 不見而名 不爲而成

此言聖人清明在窮 而義理昭徹 乃自誠而明之事也 學者不可遽跂於此 但當收斂放心以養其知而勉其所行也

○右第十一章

### 12. 天下有道 却走馬以糞 天下無道 戎馬生於郊

董氏曰 糞治田疇也 戎馬戰馬也 郊者二國之境也 以內言之 心君泰然則郊返氣馬以培其本根反 是則氣馬馳於外境矣

禍莫大於不知足 咎莫大於欲得

董氏曰 求其根本原於縱欲

故知足之足 常足矣

無求於外則內德無欠 故應用無窮而常足矣

○右第十二章 以上五章 言守道克己不自矜伐 常知上止足之義 皆推演嗇字之義也

### 13. 我有三寶 保而持之 一曰慈 二曰儉 三曰不敢先

不敢先者謙也 慈儉謙 三者持身接物之寶訣也

夫慈故能勇

董氏曰 仁者必有勇也

儉故能廣

董氏曰 守約而博施也

不敢先 故能成器長

器 物也 自後者人必先之 故卒爲有物之長也 董氏曰 之出庶物亦曰 見群龍無首 吉

今捨其慈且勇 捨儉且廣 捨其後且先 死矣！

務勇則 必伎 務廣則 必奢 務先則 必爭 皆死之徒也

夫慈以戰則勝 以守則固 天將救之 以慈衛之

董氏曰慈者生道之流行 乃仁之用也 故爲三寶之首 以慈御物 物亦愛之 如慕父母 效死不辭 是以戰則勝 守則固 故曰仁者無敵於天下也 苟或人有所不及 天亦將以慈救衛之 蓋天道好還 常與善人故也 程氏曰 去邠而岐周以興 是其救也

○右第十三章 言三寶爲修己長物之要 道其下六章 皆推廣此章之義 蓋因嗇字之義而伸長之也

**14.** 人之生也柔弱 其死也堅強 草木之生也柔脆 其死也枯槁 故堅強者死之徒 柔弱者生之徒

冲氣在身 則體無堅強之病 以理勝氣 則事無堅強之失矣

是以兵強則不勝 木強則共 故堅強居下 柔弱處上

董氏曰 共謂人共伐之也 列子云共強則滅 木強則折 是矣 物之精者 常在上而粗者常在下 其精必柔 其粗必強 理勢然也

天下柔弱莫過於水而攻堅強 莫之能勝 其無以易之

善下而柔弱 故必勝堅強 其理不可易也

故柔勝剛弱勝強 天下莫不知 莫能行

觀水之功堅則其理昭然 豈難知哉 非知之難行之惟艱 故人鮮克行之

是以聖人言受國之垢 是謂社稷主 受國不祥 是謂天下王

溫公曰 舍垢納污乃能成其大 愚按仁覆如天 無物不容 是謂受垢與不祥也

○右第十四章 因上章戰勝之設 而推明慈柔勝剛暴之義 夫所謂柔者只言仁慈之

形耳 非一於柔弱而已 若一於柔弱則豈能勝剛暴哉 且其勝之者 亦出於理勢之當然耳 非有心於欲勝而故為柔弱也

## 15. 持而盈之 不如其已 揣而銳之 不可長保

恐盈之或溢 而持固之 不若不盈之為安也 恐銳之或折 而揣量之不若不銳之可保也 蘇氏曰 無盈則 無所用持 無銳則無所用揣矣

金玉滿堂 莫之能守 富貴而驕 自遺其咎 功成名遂身退天之道

劉師立曰 盈則必虛戒之在滿 銳則必鈍戒之在進 金玉必累戒之在貪 富貴易淫戒之在傲 功成名遂必危在乎知止而不失其正

○右第十五章 言儉之義

## 16. 貴以賤為本 高以下為基 是以侯王自謂孤寡不穀 此其以賤為本耶？非乎？

夫惟自賤則人必貴之 自下則人必高之 是以賤為本以下為基也 侯王之自貶 是自賤自下之道也

○右第十六章 言不敢先之義 下章同此

## 17. 上善若水 水善利萬物又不爭 處眾人之所惡 故幾於道

董氏曰守柔處下乃俗之所惡而實近於道

江海所以能為百谷王者 以其善下之 故能為百谷王 是以聖人以言下之 以身後之 是以處上而人不重 處前而人不害 天下樂推而不厭

水固近道而江海又水之大者也 宋徽宗曰 屯初九曰以貴下賤大得民也得其心也 處上而人不重則戴之也懼 處前而人不害 則利之者眾 若是則無思不服 故不厭也 董氏曰 楊雄曰自下者人高之 自後者人先之 故天下樂推戴而無厭斃之心也

○右第十七章

## 18. 善為士者不武

董氏曰 不尚力也

善戰者不怒

不得已而用兵 非出於血氣之怒也



善勝敵者不爭

只以征伐 正其不正而已 非有爭奪之心也

善用人者爲之下

致敬盡禮 屈己以下賢然後 能用賢 孟子曰 湯之於伊尹學焉而後臣之

是謂不爭之德 是謂用人之力 是謂配天 古之極也

謙卑自牧與人爲善 故人樂爲用 其德配天 無以尙矣

○右第十八章 極言慈柔謙下之德 可以配天也

**19.** 上士聞道 勤而行之 中士聞道 若存若亡 下士聞道 大笑之 不笑不足以爲道

上士聞道 篤信不疑 中士疑信相半 下士茫然不曉 反加非笑 若合於下士所見 則豈聖人之道哉

建言有之 明道若昧 進道若退 上德若谷 太白若辱

建言古之所立言也 明道者若無所見 進道者退然若不能行 德之高者 自謙如谷之虛 潔白之至者 自處如有玷污也

大器晚成

積之久然後發之洪 故大器不速成

大成若缺 其用不弊

董氏曰 敝敗壞也 體至道之大全而盛德若不足 故其用愈久而愈新也

大盈若冲 其用不窮

道備於已而謙若冲虛 故積愈厚而用愈不窮 董氏曰 此兼用而言 愚按中間二句言其用上下則皆略文也

大直若屈 大巧若拙

與物無競 故其直若屈 曲當而無跡 故其巧若拙

5-1

大辯若訥 善者不辯 辯者不善 信言不美 美言不信

不事乎辯而發泌當理者謂之大辯 吉人辭寡 故其辯若訥 以善為主則不求辯 以辯為主則未必善也 美者華飾也 忠信之言 不必華美 華美之言 未必忠信

大音希聲 大象無形 道隱無名

希者聽之不聞也 道本無聲無臭 而體物不遺 強名之曰道 其實無名也 體用一源 顯微無間之妙 豈中下土之所能聽瑩哉

○右第十九章 推明謙虛之德 合乎道體之本然 文王望道而如未之見 顏子以能問於不能 以多問於寡 有若無 實若虛 犯而不校 卽此章之意也 申言十三章寶之義者止此

## 20. 重爲輕根 靜爲躁君 是以君子終日行不離輜重

重是本 輕是末 不可捨本而趨末 靜是君 躁是卒徒 不可捨君而逐卒徒也 董氏曰 輜大車也 君子之道以靜重爲主不可須臾離也 如輜車之重不敢容易其行

雖有榮觀 燕處超然

雖在繁華當貴之中而無所係戀 常超然自得於物欲之外也 董氏曰 榮觀在物 燕處在己 惟不以物易己 故遊觀榮樂 而無所係著也

奈何萬乘之主 而以身輕天下？ 輕則失身 躁則失君

董氏曰 萬乘之尊 不可縱所欲之私 而不顧天下之重也 君輕則失於臣 臣躁則失於君矣 近取諸身則以心爲君以氣爲臣 輕則心妄動而暴其氣 躁則氣擾亂而動其心

飄風不終朝 驟雨不終日 天地尚不能久 而況於人乎？

董氏曰 狂疾之風 急暴之雨 此陰陽擊搏 忽然之變 故不能久 自朝至中爲終朝 愚按人有輕躁之病則必有急暴之行 暴怒者必有後悔 以至暴富暴貴者 必有後禍 皆非長久之道也

○右第二十章 言君子主乎靜重而不動於外物 亦嗇之義也

## 21. 躁勝寒靜勝熱 清靜爲天下正

董氏曰 動屬陽 靜屬陰 故躁勝寒靜勝熱 皆未免於一偏也 清靜者動靜一致 故爲天下正 愚按清靜者泊然無外誘之累 而動靜皆定者也

○右第二十一章 因上章躁靜之義 而言清靜之正 恐人之偏於靜也

5-2

## 22. 知者不言 言者不知

知道者默而識之 有知輒言非知道者也

塞其兌 閉其門

兌說也 塞其兌者防室意慾也 門口也 閉其門者淵默自守也

挫其銳 解其紛 和其光 同其塵 是謂玄同

銳英氣也 挫其銳者 磨礱英氣使無圭角也 紛衆理之肯綮也 解其紛者 明察肯綮 迎刃而解也 和其光同塵者含蓄德美於中 而不自耀立異於衆也 玄妙也 既不隨俗習 非而又非離世絕俗 故曰玄同

故不可得而親 不可得而踈 不可得而利 不可得而害 不可得而貴 不可得而賤 故爲天下貴

君子周而不比 和而不同 出處合義動靜隨時 豈世人之私情 所能親踈利害貴賤者哉 其所以然者以通乎道而無欲故也 爲天下貴者是天爵之良貴也

○右第二十二章 承上章而言清靜自修之功 而因言其效下二章 皆推說其效也

## 23. 含德之厚 比於赤子

含懷至德之人誠一無僞 如赤子之心也

蜂蟲不螫 猛獸不據 攫鳥不搏

董氏曰全天之人物無害者

○右第二十三章

## 24. 蓋聞善攝生者 陸行不遇兕虎 入軍不被甲兵 兕無所投其角 虎無所措其爪

兵無所容其刃 夫何故？ 以其無死地

善攝生者全盡生理 故所遇皆正命 必無一朝之患也 或疑聖賢亦有未免禍患者曰 此只言其理而已 若或然之變則有未暇論也

○右第二十四章 與前章皆申言全德之效 七章所謂嗇以事天者其義止此

## 25. 大道汎兮 其可左右

董氏曰 汎無滯貌惟不麗於一物不離乎當處 無處不有 無時不然 是以左右逢其原也

萬物恃之而生而不辭 功成不名有

萬物之資始生成 莫非此道之流行 體物不遺而不自有其能也

是以聖人終不爲大 故能成其大

聖人無我 與道爲一 故雖成如天之事功而終無自大之心 此聖人之所以爲大也

○右第二十五章 以聖人體道之大尉修己之極 而起下章治人之說也

6-1

## 26. 善建者不拔 善抱者不脫 子孫祭祀不輟

建中建極 是謂善建 如保赤子 是謂善抱 溫公曰 不拔者深根固葉不可動搖 不脫者民心懷服不可傾奪 不輟者享祚長久是也

修之身 其德乃真 修之家 其德乃餘 修之鄉 其德乃長 修之國 其德乃豐 修之天下 其德乃普

真者誠實無妄之謂也 以真實之理修身推其餘 以治人家國天下 不外乎是而已 溫公曰 皆循本以治末由近以及遠也

○右第二十六章 始言治人之道 而推本於修身 此下六章皆申此章之義

## 27. 聖人不積 既以爲人己愈有 既以與人己愈多

聖人以己及人 己立而立人 己達而達人 博施濟衆 而於己未嘗有費 其仁愈盛而其德愈不孤矣

天之道 利而不害 聖人之道 爲而不爭

天道只以生物爲心 故利而不害 聖人順理而無私 故有所爲而不爭 此聖人所以與天爲徒者也

○右第二十七章

## 28. 善行無轍跡 善言無瑕謫 善計不用籌策

從容中道而無跡可見 發言爲法而無瑕可指 不思而得 而泛應曲當 此聖人之事也

是以聖人常善救人 故無棄人 常善救物 故無棄物 是謂襲明

有教無類而人無不容物無不化 以先知覺後知以先覺覺後覺 故其明傳襲無窮也

故善人 不善人之師 不善人 善人之資

因其不善而教之 使善則我之仁愈大而施愈博矣 此之謂善人之資也 夫善者吾與之 不善者吾教之 則天下歸吾仁矣 民吾同胞 物吾與也之義 於此可見矣

○右第二十八章 言聖人有善行善言善計 故能化不善之人 下章同此

## 29. 聖人無常心 以百姓心爲心

聖人於天下無一毫私心 只因民心而已

善者 吾善之 不善者 吾亦善之 德善 信者 吾信之 不信者 吾亦信之 德信

人之有生 同具此理 聖人之於民 莫不欲其善信 故善信者 吾既許之 不善不信者 亦必教之 以善信爲期 若棄而不教 則非所謂德善德信也 宋徽宗曰 舜之於象 所以善信者至矣

○右第二十九章

## 30. 將欲取天下而爲之 吾見其不得已 天下神器 不可爲也 爲者敗之 執者失之

天下乃神明之器 帝王之興 自有曆數 不可有心於取天下也 欲爲天下者必敗 欲執天下者 必失矣 三代以上聖帝明王 皆修身盡道 而天下歸之 非有心於天下者也 後之帝王或有有心於天下而得之者 此亦有天命存焉 非專以智力求也

### 6-2

故物或行或隨 或煦或吹 或強或羸 或載或隳

董氏曰 煦暖也 吹寒也 強盛也 羸弱也 載成也 隳壞也 有爲之物 必屬對待 消息盈虛 相推不已

是以聖人去甚去奢去泰

去除也 聖人之治天下 因其勢而利導之 因其材而篤焉 只去其已甚者耳 所謂裁成天地之道輔相 天地之宜 以左右民者也

○右第三十章 言以無事爲天下也

### 31. 以正治國 以奇用兵 以無事取天下

蘇氏曰 古之聖人 柔遠能邇無意於用兵 惟不得已然後 有征伐之事 故以治國爲正 以用兵爲奇 夫天下神器不可爲也 是以體道者 無心於取天下而天下歸之矣 愚按成湯 非富天下 爲匹夫匹婦復讐 而東征西怨是也

天下多忌諱 而民彌貧 人多利器 國家滋昏 人多伎巧 奇物滋起 法令滋彰 盜賊多有

蘇氏曰 人主多忌諱 下情不上達則民貧困而無告矣 利器權謀也 上下相欺以智則民多權謀 而上益眩而昏矣 奇物奇怪異物也 人不敦本業而趨末伎則非常無益之物作矣 患人之詐僞 而多出法令以勝之 民無所措手足則日入於盜賊矣

故聖人云 我無爲而民自化 我無事而民自富 我好靜而民自正 我無欲而民自樸

董氏曰 此自然之應而無爲之成功也

其政悶悶 其民淳淳

悶悶寬仁不察之象也 董氏曰 爲政以德則不察察於齊民以俗觀之 若不事於事 然民實感自然之化 乃所以爲淳和之至治也

其政察察 其民缺缺

董氏曰 不知修德爲本而專尚才智 欲以刑政齊民則必有所傷 故缺缺也

禍兮福之所倚 福兮禍之所伏 孰知其極？

一治一亂 氣化盛衰 人事得失 反復相因 莫知所止極 而惟無爲者能治也

○右第三十一章 承上章而言無爲之化也

### 32. 不言之教 無爲之益 天下希及之

聖人不言而體道無隱 與天象昭然 常以示人 此謂不言之教也 無所作爲物各付物 而萬物各得其所 此謂無爲之益也

○右第三十二章 申上章無爲之義而結之 夫以無爲治人亦嗇之義也 推設二十六章之義者止此

### 33. 以道佐人主者 不以兵強天下 其事好還 師之所處 荊棘生焉 大軍之後 必

有凶年

宋徽宗曰 孟子所謂反乎爾者 下奪民力 故荆棘生焉 上干和氣 故有凶年

7-1

故善者果而已 不敢以取強

董氏曰 兵固有道者之所不取 然天生五材亦不可去 譬水火焉在乎善用 惟以止暴濟難則果決於理而已 何敢取強於天下哉

果而勿矜 果而勿伐 果而勿驕 果而不得已 是果而勿強

董氏曰 果以理勝強以力勝 惟果則有必克之勢初非恃力好戰 故臨事而懼 好謀而成 不得已而後應之 勿強而已

物壯則老 是謂不道 不道早已

董氏曰 物壯極則老 兵強極則敗 皆非合道宜早知止 此章謂輔相以道 則人心愛戴 而用兵爭強 不足服人

○右第三十三章 上章既盡 治人之說而兵亦有國之勢不能去者 故言用兵之道 宜果而不務強 且宜早知止 不章亦同

夫佳兵 不祥之器 物或惡之 故有道者不處

董氏曰 佳兵者用兵之善者也 兵終爲凶器惟以之濟難 而不以爲常 故不處心於此也 愚按孟子曰 善戰者服上刑 亦此意也

君子居則貴左 用兵則貴右

董氏曰 左爲陽 陽好生 右爲陰 陰主殺

兵者不祥之器 非君子之器 不得已而用之 恬憺爲上 勝而不美

勝而不美 雖勝戰而不以爲美也 董氏曰 憺安也 好生惡殺而無心於勝物也

而美之者 是樂殺人 夫樂殺人者 則不可得志於天之下

勝戰而以爲美者 是嗜殺者也 孟子曰不嗜殺人者能一之亦此意也

○右第三十四章

**35.** 以道莅天下 其鬼不神 非其鬼不神 其神不傷人 非其神不傷民 聖人亦不傷民 夫兩不相傷 故德交歸焉

聖人之治天下 人神各得其道 陰陽和而萬物理無有邪氣干其間 故鬼神無眩怪之變 此謂其鬼不神也 豈有鬼怪傷民者乎 聖人之治 不傷於民 故人神肯悅 衆德交歸如此 列子曰 物無疵癘 鬼無靈響是也 朱子曰 若是王道修明則不正之氣都消鑠了 愚按後世崇尚佛老 廣張淫祀 寺觀相望 必欲使其鬼有神 眞此書之罪人也 治世者既不能禁 又從而惑之 豈不悖哉

○右第三十五章 言王道之效至於人神各得其所 七章所謂齋以治人者其義止此

### 36. 合抱之木 生於毫末 九層之臺 起於累土 千里之行 始於足下

此設喻言凡大事必始於細微也

圖難於其易 爲大於其細 天下難事 必作於易 天下大事 必作於細

善惡皆由積漸而成 若以細事爲微而忽之 以易事爲無傷而不慎 則細必成大 易必成難 言當慎之於始而慮其所終也

夫輕諾必寡信 多易必多難

不慎於始則後必有悔

是以聖人猶難之 故終無難矣

聖人於易事猶難慎 故終無難濟之事也

其安易持 其未兆易謀 其脆易破 其微易散 爲之於未有 治之於未亂

凡事慎始則終必無患 在修己則爲不遠而復 在爲國則爲迨天未雨 綢繆牖戶之意

○右第三十六章 言慎始善終之意 以盡修己治人之道 蓋足其未足之義也

7-2

### 37. 勇於敢則殺 勇於不敢則活 此兩者 或利或害 天之所惡 孰知其故？ 是以聖人猶難之

剛強者死之徒 柔弱者生之徒是常理也 或有時而反常 強利弱害則天之所惡難曉其故 聖人猶難言也 雖然要其終則未終少失 故下文歷陳之

天之道 不爭而善勝

溫公曰 任物自然而物莫能違



不言而善應

董氏曰 天何言哉 四時行焉其於福善禍淫之應 信不差矣

不召而自來

董氏曰 神之格思 本無向背 如暑往則寒來 夫召而後至哉

天網恢恢 疎而不失

董氏曰 要終盡變然後 知其雖廣大而 微細不遺也

民不畏威 則大威至

民當畏威如疾若不畏威 則必有可畏之大威至矣 不可以天道爲無知也

○右第三十七章 言天道福善禍淫之理以爲戒 下章同此

**38. 天之道 其猶張弓乎？ 高者抑之 下者舉之 有餘者損之 不足者與之 天之道 損有餘而補不足**

董氏曰 天道無私常適乎中 故滿招損謙受益時乃天道

天道無親 常與善人

書曰 皇天無親克敬惟親 卽此意也

○右第三十八章 與上章皆言天道而天道虧盈益謙而已 亦不出嗇之義也

**39. 吾言甚易知 甚易行 而天下莫能知 莫能行**

性本固有道不違人指此示人 宜若易知易行而賢智過之愚不肖不及所以莫能知莫能行也

言有宗 事有君

言以明道 事以行道 隨言隨事 各有天然自有之中 乃所謂至善而言之宗也 事之君也

夫唯無知 是以不我知

衆人於道無識見 故終莫我知也

知我者希 則我者貴

溫公曰 道大故知者鮮也

是以聖人 被褐懷玉

內蘊至德而不求人知如被褐衣而懷寶玉也

○右第三十九章 歎人之莫知而悼道之難行 是終篇惓惓爲人之意也

#### 40. 大道甚夷 而民好徑

道若大路 豈難知而難行哉 只是民情牽於私意求捷徑而不遵大路耳

○右第四十章 承上章而言人之不能知不能行者由不知率性之道而妄求捷徑故也  
屈原曰 夫惟捷徑而窘步 亦此意也

右醇言 凡四十章 首三章 言道體 第四章 言心體 第五章 摠論治己治人之始終 第六章七章以損與嗇爲治己治人之要旨 自第八章止十二章 皆推廣其義 第十三章 因嗇字而演出三寶之說 自十四章止十九章申言其義 二十章言輕躁之失 二十一章 言清靜之正 二十二章 推言用功之要 二十三章四章申言其全天之效 二十五章言體道之效 二十六章止三十五章言治人之道及其功效 三十六言慎始慮終 防於未然之義 三十七章八章言天道福善禍淫虧盈益謙之理 三十九章四十章歎人之莫能行道以終之 大抵此書以無爲爲宗 而其用 無不爲則亦非溺於虛無也 只是言多超詣 動稱聖人 論上達處多 論下學處少 宜接上根之士 而中人以下 則難於下手矣 但其言克己窒慾靜重自守 謙虛自收慈簡臨民之義 皆親切有味有益於學者 不可以爲非聖人之書而莫之省也